





清故通議大夫都察院右副都御史子延劉

公墓誌銘

孫光祀

康熙癸丑七月子延撫軍訃至舉朝痛悼惜正人之未竟其用而天道之不可問也余與子延皆出海豐王夫子之門又同讀中祕書交最淡居恒告語頗能悉其生平今其叔子匍匐千餘里屬余爲銘隧之文余又何辭哉按狀公諱祚遠字子延號石水一號鶴林始祖自棲霞遷安丘故世爲安丘



人歷數傳遂爲著姓其五世叔祖雲川公中正德朝進士爲河南副使泰岩公以隆慶朝進士仕至通政使洎其叔祖思石公舉崇禎朝進士以憲副備兵溫處而少傅憲石公復中戊辰榜進士以翰林院編修經事 世祖章皇帝歷官文華殿大學士門祚翔貴焜耀青齊惟公自高曾以來顧隱於農祖太和公諱從煥父翔宇公諱鵬翥少孤能砥德厲行以檢飭退讓著聞鄉黨間有加以橫逆者

弗與較歲歉竭蓄賑困不責償時稱長者娶於周生三子長明遠次錫遠季卽公生而岐嶷動止異常度七歲母周太夫人歿又三年太公歿公居喪哀毀若成人太公遺命伯氏曰吾宗科第蟬聯而吾一門支派孤弱非耕無以糊口非讀無以亢宗汝兄弟長者力田幼者力學吾瞑目矣伯氏乃爲延師課讀授公書輒悟亡何文業益進卽家計日落外侮日至弗恤也十九補邑弟子員試高等遂



人歷數傳遂爲著姓其五世叔祖雲川公中正德朝進士爲河南副使泰岩公以隆慶朝進士仕至通政使洎其叔祖思石公舉崇禎朝進士以憲副備兵溫處而少傅憲石公復中戊辰榜進士以翰林院編修經事 世祖章皇帝歷官文華殿大學士門祚翔貴焜耀青齊惟公自高曾以來顧隱於農祖太和公諱從煥父翔宇公諱鵬翥少孤能砥德厲行以檢飭退讓著聞鄉黨間有加以橫逆者

弗與較歲歉竭蓄調困不責償時稱長者娶於周生三子長明遠次錫遠季卽公生而岐嶷動止異常度七歲母周太夫人歿又三年太公歿公居喪哀毀若成人太公遺命伯氏曰吾宗科第蟬聯而吾一門支派孤弱非耕無以糊口非讀無以亢宗汝兄弟長者力田幼者力學吾瞑目矣伯氏乃爲延師課讀授公書輒悟亡何文業益進卽家計日落外侮日至弗恤也十九補邑弟子員試高等遂



有聲諸生中歲以授經自給然畱心經濟明於當世之務已以天下爲己任矣庚辰思石公備兵上黨公與偕往詢以時政咸中機宐思石公曰汝才可大受吾不及也一日過濩澤見小兒棄雪中出橐金倩人收養題詩付之壬午迄甲申盜蜂起公時居荒邨羣盜過其廬曰此善士劉君家也戒勿犯其德能感人若此亂後家益困尋攜眷授徒昌樂攻苦爲文恆伊吾達旦辛卯舉於鄉偕計北上

遇甥王氏隸司馬籍以百金贖之又壽光友人李麟甫者有子旗下貧不克贖公傾囊相予又募緣爲助卒歸其子癸巳偕孫頡初學使之太原次新樂渡河中流遇風舟將覆頡初顧謂公曰觀君公輔重器以是卜之當無恙已而風息遂濟乙未捷禮闈第二十五人以二甲成進士時世祖駐蹕南苑親選庶常見公儀狀脩偉數目之試詩文中選予吉士第十董教習者爲故少宰于公江南總



督馬公及大宗伯山陰胡公今大學士高陽李公  
四先生者皆殫精教思以迪進人才爲務特引重  
公謂其有守有爲將來可勝艱鉅必是人也踰年  
丙申值臺省臣缺員奉 上諭以漢書庶吉士十  
三人教習有成特令改補公資應第六人蒙 世  
祖拔第一給事吏垣維時少傅公在政府公引例  
迴避改銓曹郎旋里候補適撫軍耿公東巡晤公  
見宅第卑隘欲贈貲更新之公以先人敝廬不敢

易力辭乃止丁酉補考功司主事遇

覃恩加一

級賜太公官如公秩母太宐人六月奉 命典秦

中試充正考官將入關有從行吏乘閒爲言欲於  
關中媒所私公叱異之曰若不問主司爲何如人  
敢以此嘗試邪付所司究訊由是關事內外肅然  
罔不懾息奉法所得皆知名士事竣疏糾奸吏及  
夤緣爲弊者比部訊擬悉抵法 世祖每嘉與不  
置稱其不負任使云未幾轉文選司主事旋陞文



選司員外郎戊戌秋陞稽勲司郎中公居銓部甫  
二載而署考功典選事者數閱月砥操持鑑其平  
如衡蓋功罪重輕人才進退案牘參錯奸弊滋多  
公綜釐精詳行以至公從衆論紛紜中出一言爲  
斷老胥猾吏皆咋舌退同官信其誠又知其說之  
不可易乃相率而從之是以飭法之輩不得因緣  
以售其欺 清興二十年閒職銓署者自董福兄  
王東臯而外未有如公者也己亥冬當內外陞轉

公在司屬俸居後

世祖以特簡予內陞補翰林

院提督四譯館太常寺少卿庚子四月陞大理寺

卿越數日又奉

特旨改陞保定巡撫都察院右

副都御史蓋

世祖習知公賢遂屢擢而付之重

任朝紳額手咸慶得人會言者銜怨少傅公互上

章參論因忌公撫治畿內輒蔓引及公尚未之任

遽畱候質既少傅以過戇失奏對體觸

世祖怒

奪職其詆公諸事俱屬子虛歷讞得白奉

旨仍



金史加言卷之  
三  
候巡撫缺補用豈意昭雪未幾而世祖升遐數  
年之主知安能呼九京而訴之邪公在考功候  
質凡三四月後薪米不繼親知輩助給晨夕辛丑  
夏以候補東歸止餘一宅鬻爲資斧囊篋見底依  
然一寒士也尋值巡撫缺出吏部請旨以公係  
少傅姪孫相應不用坐是需次之案寢而不行夫  
既爲少傅姪孫也者先帝時豈不知之奚待異  
日嗚呼尚何言哉公抵里後絕意仕進惟閉門訓

子竿牘不至公門家故貧至經年竭蹶課農僅完  
租賦糲食敝衣泊如也然性篤於義邑事有關利  
害者向當事白之鄉閭中急無告者隨所有周之  
乙巳率同志設義倉積粟以備歲凶戊申地震城  
垣盡毀公捐貲爲一邑倡增修如舊又建橋王封  
河民不病涉庚戌派東省河夫數萬人邑僉數百  
民以爲創舉多避散公請於令議厚卹其家民始  
樂赴得竣役焉邑人有爭訟者質之公必力爲排



解俾釋憾而後卽安好獎進後學凡親友子弟以  
文相質必反覆講貫務盡其義受其教者不啻坐  
春風而飲醇醪也數年來蕭寂自安閒與貧賤交  
過從談衷道故襟懷落落益復坦施論者謂公居  
官日少厥抱弗伸宜享遐齡補所未逮孰知背疽  
爲患竟以不起邪公氣宇開霽美容止不甚修邊  
幅而昂藏不羣見者起敬服館職一年與同人道  
誼相成交與日親羣居之際諧謔并發四座爲懽

然義無偏暱苟或干以私啗以利則峻如喬嶽稜  
稜乎其弗克近也處友樸率能脫略形迹待人接  
物開喉肝見無不可告人之語而揆事度物視是  
非之界若劃山川卽強禦在前無所屈撓古所謂  
社稷臣不過是矣自爲吏部郎以至保撫苞苴之  
遺屏不得入當庚子之冬撫席尚虛或謂稍一委  
蛇卽復建牙其地公曰升沈命也進退時也吾自  
不知逢迎爲何物乃至今始學奔競可恥孰甚卒



不應此皆人所難能惟余則稔知之也方今皇  
上留意人才洞察幽抑如公沉滯覘見可期必將  
賁之帛輪還以節鉞而遽不能待也聞近者纂修  
族譜又爲諸子繪怡怡卷題而授之殆若前知者  
然嗟乎公乃止於是哉可悲也已公生於萬曆辛  
亥三月初十日申時卒於康熙十二年六月二十  
二日酉時享年六十有三娶田氏同邑處士九常  
公女封宐人副室鍾氏穆氏子男四長仁瑞次仁

雨次仁霖次仁京今於本年十一月十九日厝於  
祖塋爲之銘曰扶輿閒氣萃於渠丘篤生偉人申  
甫之儔高門弈弈紆青拖紫雖出華閱而實崛起  
文濤撼石筆露橫秋氣凌五岳風發雲流延英重  
器玉堂妙選峻整之姿特膺帝簡尋移梧省旋  
歷銓曹山濤識朗李重名高發弊得人克典試事  
上嘉其能晉之卿貳乃授節鉞畀以重任忽罹  
青蠅不隕厥問雖曰其枉却賦歸來鳳棲鸞伏未



展其才週甲未幾云何其逝茫茫造物云何其厲  
以公至性坦易純誠以公德量履滿不盈器則公  
輔品則名賢不愧不忤體受歸全四丈夫子嗣芳  
繼美公有貽謀亦既厚只松楸蒼蒼渤海滢滢於  
萬斯年護茲幽宮

故兄原任浙江按察司副使思石劉公行狀

弟正宗

順治丁酉十一月余以扈 蹕辦事南海子聞長

兄思石公訃音摧痛欲絕蒙 皇上垂憫使回私

寓得以爲位而哭兼破成例 特準假歸治葬存

歿沾榮矣因念余兄生平砥行宦遊十七年又里

居十年始終不渝不可不勉爲狀求銘表以永其

傳但余久羈京邸故其宦蹟未及目覩且傷悼未



已心緒錯迂卽就所知辭又不足以達之惟作者  
鑒此意可也敬揮涕敘次如左公諱正衡字元定  
號思石萬曆己丑年九月十四日生於京邸時余  
大父掌選事家人預夢公生期當後余大父誕辰  
十日旣而果然因皆知其非凡兒蓋余大父本九  
月初四日生也年六歲余父見背九歲時余大父  
捐館十五時余母又見背公哀瘠如禮卽能綜理  
家務訓誨余及次兄兩幼弟外禦侵侮門戶賴以

不墜歲戊申應里選受知於邑侯金沙虞公虞公  
丁未會魁負人倫鑒讀公卷大奇之榜爲茂才異  
等言非同試諸生所得儕偶也是年入黌序甲子  
舉於鄉以策中有指鹿之奸等語幾罹不測罰停  
二科魏璫敗乃與會試辛未成進士殿榜二甲應  
授戶部主事時戶曹各差有脂膏名同選多爭之  
者公獨夷然不屑甘就比部當事者皆嘆其有遠  
識癸酉冬審錄畿南讞決平允甲戌陞本部員外



郎乙亥春陞太平知府太平爲江南瘠郡歲租漕糧積逋甚多公催徵有法解運早竣而民不擾巡方首列薦牘慈惠廉勤三年如一日郡人戴之如父母戊寅夏陞浙江按察司副使督理驛傳事務公素清恬當此衝地貴顯接踵緣絀於力一切酬應皆從簡約致爲北上閩人選郎所不喜徵諸言已卯夏改河南信陽道副使平調危地時論爲之不平云流寇盤踞楚豫閒信陽孤城無援公備禦

周詳卒無失事庚辰春武陵楊公以督師至論其不長於兵降二級授山右冀南道僉事駐潞安府潞安亦正苦寇公剿撫兼施地方恃爲長城焉且時適饑饉公督率所屬郡邑設法煮賑活者無算辛巳秋陞浙江溫處道副使壬午春抵任旋聞余繼祖母訃讀承重禮回籍治喪厚謹是冬有安丘城守功甲申流寇陷京師山左羣盜蜂起渠丘更雲擾復率里人乘城數月是秋避地南如江寧乙



酉春起復補廣東按察司副使至粵未久聞金陵  
不守解綬寄居羅定州丁亥北還以十月至里壬  
辰山左巡方以地方人才薦吏部覆准仍以副使  
降一級用癸巳公至京引目病具呈假歸蓋不復  
有用世志矣丙申四月感痰症時作時止至今十  
一月初七日告終享年六十有九嗚呼痛哉公天  
性坦夷介直讀書外無他嗜好成童以前屢遭大  
喪卽能孝友自豎鄉黨宗族皆稱其賢弱冠時尚

喜遊宴旣而韜斂謹畏務爲敦樸稱孝廉六年先  
世房產僅以不失而生事日落於爲諸生時常自  
嘆其拙入宦途二十七年卒之日囊中不儲一錢  
棺木亦貸於人則其素履可知矣憶余兄弟析爨  
時房取其隘者田取其少而瘠者又雅好敦睦親  
族庚辰辛巳閒大荒公自潞安令家人以儲粟周  
急闔族無死徙壬午憂居同邑令理守禦具建議  
捐貲創敵臺數座邑得以完與親知故人處犯亦



不校然是非利害所在必力持之雖賁育不能奪  
故人亦不敢狎而易焉蓋其義理之勇秉之性生  
者然也公無子息有勸之廣姬媵者皆不聽謂業  
有姪奉先人之祀矣何必已出處之泰然於兩弟  
子女撫摩勤懇非待勉強其視他人之分別爾我  
骨肉參商者豈不霄壤懸哉公自嶺表北歸舟行  
遇盜夫婦履江面二十餘步能不溺登岸若有神  
助者人謂篤行之報當不誣矣歸又十年從容丘

園以正命終或亦可以無憾歟或亦可以無憾歟  
公初娶邑庠生韓公必登女天啟乙丑先卒繼娶  
邑庠生李公初復女皆無出嗣子承申余次男也  
尚未聘弟正宗謹狀



少傅公行狀

外孫曹申吉

順治辛丑歲除前一日聞外王父少傅公之訃申  
吉暨諸親族置位於堂北向而哭者旬有餘日矣  
然猶拘大德必壽之說恍然以疑而未忍遽信我  
公之歿也迨康熙壬寅元夕舅氏自京邸遺一札  
云先少傅棄諸孤而長逝矣不孝擗踊之中瞶昧  
益甚先少傅生平懿行不克略陳其概思骨肉閒  
惟甥受知最深敢以狀請小子申吉捧函涕泗而



始信我公之歿也念申吉自藐孤以迄成立拊育  
教誨無非外王父之德客秋拜別時杖履無恙卽  
聞病以來書教殷勤猶不失常度何期一旦奄然  
竟成永訣申吉聞喪之餘筆札俱廢又安能操觚  
以從事邪矧外王父清操亮節表表在人耳目是  
非定於昭代功業煥乎史冊豈區區家乘之私  
言遂足爲我公重獨是家世之淵源官閥之次第  
不敢不約略述之以備大君子之採擇焉謹考公

姓劉氏諱正宗字可宗號憲石

先皇帝賜號中

齋世爲安丘之安泰里人自始祖榮八傳而至公  
代有令德曾祖魁先封吏部稽勲司主事祖希孟  
隆慶辛未進士任吏部文選司郎中再遷通政使  
司右通政父如金邑庠生先贈文林郎翰林院編  
修再贈中憲大夫內翰林國史院侍讀學士加一  
級後三代同贈光祿大夫少傅兼太子太傅內翰  
林祕書院大學士兼吏部尚書曾祖母董氏祖母



王氏徐氏母趙氏同贈一品夫人公兄弟三人長正衡崇禎辛未進士歷任浙江溫處道副使次正鑑邑廩生皆先公歿公其季也兩兄少孤而公爲遺腹子熒熒在抱而復失恃賴祖母徐鞠養兩兄友愛岐嶷夙慧識者早卜其非常人矣弱冠補博士弟子員食餼郡庠與兩兄相師友共加淬勵一時文彩斐然有聲黌序閒北海稱劉氏三珠樹明天啟癸亥恩選明經甲子長兄舉於鄉公中副車

歸益下帷攻苦丁卯登賢書崇禎戊辰成進士公聲譽日振雅當館選而竟爲有力所排筮仕眞定理官眞定畿輔重郡百務叢紛公釐奸祛弊案乏畱牘其讞訟也虛公明允主於哀矜故畿南疑獄上官必屬公平反四郡翕然有神君之號庚午秦中聘分鄉闈得士七人解元楊畏知卽出其門焉公服官茹蘖自矢唯日飲恒山水常曰吾家世守清白古一錢太守吾師也李恒山五載囊無長物



行取之日清風兩袖而已一時繡衣大吏每上薦  
牘必列公爲弁五載之內刻揚者廿餘章朝廷方  
嚮意吏治詔必更歷民事者許備館職公以循卓  
最著入爲翰林院編修當時事孔棘臺垣煊赫被  
擢者多以西清爲冷局公獨用自喜以爲瀛洲仙  
署吾可潛心著述以文章爲經濟可也由是益肆  
力風雅流連篇什與同時名輩唱和相高有嘉隆  
七子之遺風焉尋爲東宮講讀官誥敕撰文起居

注戊寅奉使冊孟津藩庚辰禮闈同考得士馮洪  
孜等十六人癸未奉使冊衡藩便道歸里值邑中  
土寇蜂起公修繕城隍率邑人固圉自守一方屹  
然恃爲保障及聞李逆陷京師公棄家南渡我

皇清定鼎燕都蒐用舊臣順治丙戌補公內翰林  
國史院編修禮闈同考得士王同春等廿二人復  
爲浙江鄉試正主考得士馮美玉等一百七十八  
兩浙知名士悉入網羅數科以來捷南宮者大半



越中傳爲知人之鑑云巳丑晉侍講學士尋轉侍  
讀學士辛卯 恩詔加一級壬辰晉祕書院學士  
教習庶吉士訓迪有方誘掖不倦從遊諸彥咸景  
爲先民矩矱癸巳夏晉吏部右侍郎佐銓未久拜  
內翰林弘文院大學士冬以冢卿虛席 先皇帝  
慎重其選特進公一級加太子太保出攝部事公  
方嚴持重人不敢干以私銓政肅然爲統均者之  
最乙未夏加少保復入內院辦事尋改祕書院大

學士公旣以清結

主知而文字尤爲

上所眷

凡得法書名畫必命公品隲始爲珍藏故 御府  
圖書往往皆公手跋而公之議論謹正啟沃深遠  
太平之業贊襄爲有助焉退食之暇門無雜賓唯  
焚香兀坐一室圖史嘯咏之外澹如也丁酉春考  
一品滿晉階光祿大夫少傅兼太子太傅贈三代  
皆如公官纂修 太祖 太宗聖訓及纂修通鑑  
公皆爲總裁官冬公以長兄憲副公之喪特疏請



歸營葬事

溫綸優許人皆榮之戊戌 先皇帝

詳考典制改院為閣公以少傅兼太子太傅為文  
華殿大學士兼禮部尚書己亥秋重闢禮闈公為  
正主考得士朱錦等四百人時方嚴師生之禁公  
撤棘之後門無私覲時以為得大臣體庚子以羣  
咻得罪 先皇帝蒙恩革職歸旗公閉門思愆絕  
無怨尤一語方圖耽心載籍優游化日之下以永  
天年不謂天不憖遺甫踰歲而疾遂不起也公於

書無所不窺而最工聲律其論詩也以法為準晚  
唐而下置不復道故其自運範才與學而神明於  
法之中李滄溟何大復不足多也晚節尤精五言  
古詩氣格道上在陳拾遺張曲江之間所著有司  
恒遊草木天草雪鴻齋草逋齋集逋齋二集逋齋  
三集並未刻稿數種兼之筆法秀妙行草沐浴於  
右軍大令而得其神似正書法虞永興而備有歐  
陽率更風骨片言尺牘海內傳以為重其有得於



臨池者素矣公為人清姿癯然矯矯以風節自命  
崇恬靜尚廉隅剛方峭直其性然也公尤好潔凡  
案閒有纖塵必手自拂拭每聞狂飈揚塵則竟日  
不怡故疾惡如讎守身如玉殆得之天授乎至於  
獎誘後進辯論古今輒疊疊不止所以小子申吉  
生也晚猶幸於門庭几杖之間獲奉典型而今  
竟不可復覩矣嗚呼痛哉公生於明萬曆二十二  
年八月初八日寅時卒於 大清順治十八年十

二月二十日戌時享年六十有八元配黃氏邑庠  
生黃公應辰女前癸未進士文選司郎中黃公禎  
女曾孫也先封孺人壬午死難聞於朝贈烈節宜  
人後贈一品夫人子三長處仁元配黃夫人出郡  
庠生娶太學生王公臺女前己丑進士大參王公  
孟煦孫女也早卒次恣之側室張氏出官蔭生娶  
順治丙戌進士戶部郎中周公曆長女次承申側  
室華氏出官蔭生出繼伯父思石公後未聘女七



長適太學生孫公毓秀男邑庠生爾瞻次卽予母  
今 誥封太淑人次適馬公道勸男邑庠生長祐  
次適前壬戌進士禮部主事曹公廷輔男邑庠生  
大順早卒次適順治丙戌進士戶部郎中周公曆  
長男拔貢生濟生俱元配黃夫人出次適前戊辰  
進士太常寺卿傅公鍾秀男萊州府廩生廣初側  
室楊氏出次許字諸城前錦衣衛百戶臧公允德  
男振乾側室趙氏出孫女一許字順治辛丑進士  
馬公澄男庭篋恣之出小子申吉上追王父之休  
媿敢昧本源下維舅氏之孝思敬陳大略儻蒙仁  
人君子傷先哲之淪亡哀諸孤之童穉不遺蕪穢  
採爲菁華錫之以嘉言勒諸貞珉豈惟申吉暨舅  
氏感德不朽實外王父泉壤之光也謹狀



里諡貞惠季木劉先生文

宋繼澄

古者諡以尊名累生時之行而諡之然有美惡焉  
 至里有賢人君子後之秉彝者愛而慕之感於心  
 而不忘且凡衆同情焉則於諡之義著其美為不  
 誣也渠丘劉季木先生其生時之行詳於馬見素  
 先生之誌要其見義必為率履不越大行受大名  
 在守城致死若為遼生謀館授室為人贖婦子備  
 棺斂負欠不能償者焚券為人代輸歲大饑勸賑



鬻居活人云先生之細行乎皆以見先生之成德也先生以伯母徐太夫人恩撫成人徐歿廬徐墓風雪在所廬讀禮見素先生見而感泣慈孝相淡之至性豈報之云乎昔公叔文子卒所以易其名者曰凶饑爲粥與國之餓者是爲惠國難以死衛君是爲貞夫其惠視季木先生之惠何若其貞視季木先生之貞何若公叔文子所謂細行而季木先生大行也據德錄功名當其實惟季木稱焉敢尊其名曰貞惠先生諡不著其孝於先生有遺焉孝常德也大孝不名故以貞惠盡之



安丘劉氏族譜卷七終

安丘劉氏族譜卷八

墳墓

古者春秋墓祭先期致齋朝日至墓所省視三周  
悽愴之心形於色今之祭者其長老率其子弟拜  
而奠之適而來適而歸其子弟亦從其長老拜而  
奠之而已祖禰而上環而祭者不知爲何代之墓  
也子弟不以問長老不以告霜露怵惕之感無聞  
焉甚有晏息自好遣子弟以往或至夷而壠怠若



祭仁人孝子其托誠何所歟茲譜詳列先塋所在  
山原分合載著既明不使後世有憾於泉壤也紀  
墳墓第八

傑公墓在邑東北四十里西安泰岓山濰水在其  
左陸山汶水繞其右康熙乙卯正學會族眾勒石  
封側

普公墓在城東北二里許十二戶公原葬安泰至  
雲川公乃遷葬於此

汶溪公墓在十二戶高祖墓之西四步三峯並峙  
墓在中峯南之十五步背水面山左沙高起眾水  
會聚明堂而東 計六尺為一步

勉公墓在東安泰村西

魁公墓在東安泰村南

雲川公墓在高祖墓之西北四步

雲田公墓在高祖墓之西十一步

希夷公墓在高祖墓之西北七步



希周公墓在高祖墓之西北七步

誠軒公墓在高祖墓之西四十步穴居右峯之南

泰岩公墓在高祖墓之西二十三步近界水

吾祖次岩公墓在高祖墓之西南三十八步北向

議遷未果

希憲公墓在西安泰村西一世祖墓之東北五十

步

希寧公墓在東安泰村西北

雙鶴公墓在十二戶高祖墓之東南七步

如梅公墓在十二戶祖塋

西源公墓在十二戶高祖墓之東北二十步

奉宇公墓在孟哥莊之西北

鳳野公墓在十二戶高祖墓之西三十七步

鳳衢公墓在十二戶高祖墓之西南四十六步

礪石公墓在十二戶高祖墓之西二十八步

漆園公墓在十二戶高祖墓之西南五十步



帝卿公墓在趙哥莊南

如楫公墓在十二戶祖塋

如柏公墓在東安泰村南

貞白公墓在十二戶高祖墓之西南五十二步

吾父貞惠公墓在十二戶高祖墓之東北五十一

步穴居左峯之南

藏澤公墓在十二戶高祖墓之西南六十步

木王公墓在十二戶高祖墓之西南四十三步

肖源公墓在十二戶高祖墓之東北十八步

子昭公墓在十二戶高祖墓之東北十六步

冠東公墓在趙哥莊南

太和公墓在東安泰莊南

仰鳳公墓在十二戶高祖墓之西四十五步

瞻鳳公墓在十二戶高祖墓之西六十步

慰鳳公墓在十二戶祖塋西北之新塋

思石公墓在十二戶祖塋西南之新塋



明範公墓在十二戶高祖墓之西南六十六步

騰鯉公墓在孟哥莊西

騰躍公墓在孟哥莊北

元明公墓在十二戶祖塋東之新塋

正燦公墓在十二戶高祖墓西南五十七步

似鳳公墓在十二戶高祖墓之東北三十一步

若鳳公墓在十二戶高祖墓之西七十四步

明分公墓在十二戶高祖墓西南五十三步

伯雍公墓在韓家村西新塋

正己墓在十二戶祖塋東北貞惠墓之東南五步

鵬翰墓在十二戶祖塋子昭公墓北四步

鵬翔墓在十二戶祖塋肖源公墓北四步

鵬翥墓在東安泰村北

鵬翹墓在十二戶祖塋西源公墓東二十一步

鵬詡墓在十二戶祖塋高祖墓東北五步

鵬翼墓在十二戶祖塋西源公墓東九步



鵬翹墓在東安泰北

鵬翥墓在東安泰北

鵬羽墓在趙哥莊南

鵬翹墓在雙溝頭村東

永培墓在十二戶高祖墓西北五十步

士奇墓在十二戶高祖墓西八十四步

永貞墓在十二戶高祖墓西四十六步

永坦墓在十二戶高祖墓西南六十步

永吉墓在十二戶高祖墓西北五十五步

永年墓在十二戶高祖墓西南六十九步

處敬墓在十二戶祖塋東之新塋

永禧墓在牟山新塋

處厚墓在十二戶祖塋東之新塋

處仁墓在十二戶祖塋東之新塋

永安墓在十二戶高祖墓西四十四步

明遠墓在東安泰北



名爵墓在趙哥莊東南

神遠墓在東安泰北

源清墓在十二戶祖塋西源公墓東三十五步

琬墓在十二戶高祖墓西八十一步

弘志墓在趙哥莊南

珣墓在十二戶高祖墓西北七十四步

瑄墓在十二戶高祖墓西南五十二步

安丘劉氏族譜卷八

終

### 安丘劉氏族譜卷九

#### 家廟

君子將立宮室宗廟爲先故天子七廟諸侯五大夫三士一廟今大夫士獻於家而已與祭於寢者等廟制旣闕祭亦廢焉萬柳夫子曰丹陽荆氏有家廟在黃塘村村皆荆姓廟門內堦墀井然廟後有堂餽餘於斯也供祭有田宗子主之每歲元旦無貴賤男婦質明畢集宗子秉虔宗婦襄事三獻



禮成衆趨於堂而見宗之長老焉室中間一屏別男女族之長一行先登兄弟序揖升座次一行以下皆拜畢長者起自堂後出次行兄弟乃序揖升座如長一行禮挨行旅拜行盡乃止婦亦如之族有顯者行祭告禮顯者具牲牢宗子爲文以告族有大事皆裁於宗子苟不公則族長筭於廟里有不數見之客先禮宗子宗子出族黨乃次相見也余小子心慕焉願身先從事以廣荆氏家風紀家

廟第九

家廟在縣西藁街南十五步西向順治壬辰少傅公建

支祠在縣西三十里儒林莊住宅之東南向康熙壬子正學等建



安丘劉氏族譜卷九終

安丘劉氏族譜卷十

先訓

詩曰儀式刑文王之典又曰繼序思不忘書亦云  
紹聞衣德言蓋陟降對越之本在斯矣今者畎畝  
之子自田閒來知能其亦有幾猶誦法其父老言  
爲耕鑿家風矧奉先思孝者又詩書之胤也吾家  
代有賢者父以訓子兄以課弟其垂諸話言著爲  
文字不獨出於尊貴者之命辭也卽慈幃告誡比



於謨訓矣嗚呼在天之靈其不可復覩哉每憶垂  
戒諸辭誠如臨之在上者紀先訓第十

傳家兩字曰讀與耕興家兩字曰勤與儉安家兩  
字曰讓與忍亡家兩字曰淫與暴防家兩字曰盜  
與姦休存猜忌之心休聽離閒之言休作生分之  
事休專公共之利喫緊在各求盡分切要在潛消  
未形子孫不患少而患不才家道不患貧而患喜  
張門戶不患衰而患無志交游不患寡而患從邪

不肖子孫眼底無幾句詩書胸中無一段道理神  
昏如醉體懈如癱意縱如狂行卑如丐敗宗祖成  
業辱父母家聲是人也鄉黨爲之羞妻妾爲之泣  
豈可以爲吾子吾孫乎屏戒具存朝夕誦思呂新  
吾先生庭訓詞也小子誌之

但願溫恭直諒之友來此講學論道示以孝友謙  
和之行德業相勸過失相規以教訓我子弟使無  
陷於非僻不願狂躁惰慢之徒來此博奕飲酒文



過飾非導以驕奢淫蕩之事誘以貪財黷貨之謀  
冥頑無恥煽惑鼓動以益我子弟之不肖於乎由  
前之說是謂良士由後之說是謂凶人我子弟苟  
遠良士而近凶人是謂逆子戒之戒之王陽明先  
生將有兩粵之行作此以戒其子弟偶錄之俾汝  
輩知取舍焉

胡文定公語楊訓曰人家最不要事事如意常有  
些不足處便是好人家纔事事如意便不如如意  
事出來亦消長之理然也此語從閱歷中得來

今人爲子孫計或至謀人之產奪人之業日夜營  
營無所不至昔人爲子孫作牛馬然身歿未寒而  
業屬他人仇家羣起報復子孫反受其殃是殆爲  
子孫作蛇蠍也此澹園先生醒語也吁出爾反爾  
天道可畏哉

先賢格言曰見美女時作虎狼看見黃金時作糞  
土看這個中間享了多少清福讓他說話我只閉



口讓他指點我只袖手這個中間省了多少閒氣  
我施有恩不求他報他結有怨不與他較這個中  
閒寬了多少懷抱忍不過時著力再忍受不得處  
耐心且受這個中間除了多少煩惱世情濃豔處  
淡得下塵俗牽纏處斬得下這個中間省了多少  
妄想緩步當車晚食當肉寡營是智無病是福這  
個中間討了多少受用收得放心戒得忿怒薄得  
世味遠得嗜慾這個中間養了多少精神既不作  
俑亦不好事既不損人亦不利己這個中間消了  
多少災危子弟輩當熟味之

澹園先生有言曰人於倉卒顛沛之際善用一言  
解救上資祖考下蔭兒孫況其爲天下生靈造福  
者乎

爲人祖父者必教訓子孫爲傳家第一要著閒有  
不肖子孫不率教訓者不必責備子孫亦惟自省  
而已子孫之悖逆必自己不能孝順者也子孫之



爭鬪必自己不能友愛者也子孫之癡愚懦弱受人弄受人侮必自己用智用術使勢使強憤討便宜不肯喫一分虧者也類此而推種種不爽然則欲子孫之賢必先自己脩德脩德若何亦曰孝親敬長睦族和鄉恤窮急難忍辱喫虧而已能如是者方不愧爲人祖父畱此好樣與子孫謂之真教訓余錄此以自箴

稍不如意便生怨尤是不得養心之法者也隨分自足有何缺陷陽明先生曰自心缺陷世界缺陷自心滿足世界滿足不干世界事

天地萬物皆有破壞惟陰德在冥冥中雖至千萬億世不得破壞先賢格言可熟思之

王陽明先生曰凡人言語正到快意時便截然能忍默得意氣正到發揚時便翕然能收斂得忿怒嗜慾正到沸騰時便廓然能消化得非天下之大勇者不能也



薛敬軒先生曰輕當矯之以重急當矯之以緩褊當矯之以寬躁當矯之以靜暴當矯之以和粗當矯之以細察其偏而悉矯之氣質變矣

先賢格言曰仁厚刻薄是脩短關謙抑盈滿是禍福關勤儉奢惰是貧富關保身縱慾是人鬼關

陳睂公曰出一個喪元氣的進士不若出一個積陰德的平民至哉斯言

治家之法門戶牆垣務宜嚴固男女貴賤當分內閑以至男女混雜貽笑於人以忝祖宗衡陽王氏家訓也法之

正家之道當痛絕雜閒女流不可聽其私相出入蓋此流多陰智能揣婦人意向且巧爲詞說又能鼓動人妻孥無識未有不墮其術中者故骨肉之離閒隣里之忿爭皆此流構之也抑又甚焉或爲賊之導或爲姦之媒其害有不可勝言者明微君



子宜必有以待之矣劉畏所先生省躬語也錄之  
以爲家戒以上先大人貞惠公錄先賢格語示警

有田不須多有屋不須好知足自無求忌滿天之  
道所願在丘壑那復計溫飽百年能幾何榮名須  
當保其一舉世尚紛華那知名教樂衆方醉未醒

吾今夢已覺恬澹怡心神只此便是學俗情都遣  
盡久矣齊美惡莫思明日事陰晴料不著其二人  
心亦何極鮮能知止足缺陷世固然豈必滿所欲

望歲有薄田棲身有茅屋贏得樂餘年益信多清  
福回首京洛塵底事空碌碌爲語夢中人蕉鹿莫  
爭覆其三細事莫相角滔天始一勺所以知幾士

不容念頭惡奕家一著差滿盤空錯落退步儘安  
閒未必是迂闊名利兩無憑慎勿爭先脚其四

念菴用寒山體警俗義主退步有味其言暇日  
一一效顰微獨警俗實以自警云以上伯祖泰  
岩公語

士有百行首在孝弟婦有四德貌其末焉



孝天性也亦庸德也孩提之童皆知愛親世有不務誠篤謬以聲容笑貌爲恭敬者天殛之矣

諺云書中自有黃金屋世人卽以此羨其子弟曰若讀書登科第當如是也是貪心已萌於讀書時矣及得志便消剛爲柔塞智爲昏變恩爲慘染潔爲汙而人品壞矣又安望其正已爲民忠君愛國也哉苟從道德仁義起見不從富貴功名起見其善讀書者歟

富貴功名不可必孝弟忠信則可必聲色貨利不可圖問學德行則可圖

入其門聞誦讀之聲可以知其子之賢聞紡織之聲可以知其內之賢旨哉言乎以是知歌聲醉聲博奕聲投壺聲蹴鞠聲琵琶聲之足以敗人身家也

爲學務先立志志堅則成敗利鈍俱不能移故曰三軍可奪帥匹夫不可奪志也



爲學以理制心一切雜念退避日積月累自然純熟光明無障礙矣

貧而無志貧足羞也賤而無能賤可惡焉生而虛生何爲哉死而有補雖死可矣

一日之計在於寅在家常早起憂國願年豐至人  
之言也以晝作夜非家道所宜觀起臥之早晏可  
以知人家之興替矣

夜氣清明良心易見簞食豆羹真情乃生

孜孜爲善惟日不足是之謂勤不邇聲色不殖貨  
利是之謂儉今之所謂勤儉得無失之貪吝乎  
親正人聞善言處逆境乃進德修業之基喜譽詞  
交損友求快心人生之鴆毒也可不辯哉  
真修之士履苦境而亦甘薄福之人當樂境而難  
受

人當貧賤時敝衣糲食求溫飽不可得一旦得志  
則山珍海錯錦繡羅綺視若固有微時况味遂已



忘之明皇一盤費數百金及閒關蜀道日中不食  
鄉民進麥飯皇孫輩爭手掬之須臾而盡物極必  
返盛極必衰從來爲然得意常思失意時則幾矣  
貪財之人骨肉亦薄爲富不仁此之謂也

心上過不去的事此事莫作事上過不去的心此  
心莫萌

積善之家必有餘慶取利於天也不違農時穀不  
可勝食取利於地也敦詩說禮顯親揚名取利於

人也諸如此利不費資本不招怨尤正大光明可  
以永久人亦何憚而不圖哉

世人皆好殺我意獨全生非邀福也求其心之所  
安而已天地好生飛潛動植皆貪生而惡死刀俎  
苦惱不忍見聞人若設身處地則惕然汗下仙經  
云人能起一生不殺之心一切衆生見之不生恐  
怖

一瞬之樂至費千金何若散而濟貧之有利益乎



患難人所時有見而不憫必無人心急人之急正不在大也

今歲旱蝗爲虐粟價踴貴數日前已有餓死於途者余見則淚下曾鬻居得五十金並粟五十石上邑侯賑濟矣因思我同宗半菽不飽者亦不乏人悠悠彼蒼降此鞠凶何以獲免於流殍乎蓋見死不救豈無心胷況一人之胤尤所當急如椽力不能周願我族人共相勸勉與其華美於居服無寧

先奉我伯叔與其浪費於犬馬無寧且養我子姪幸量力捐輸全活我族人卽欣慰我祖宗仁人孝子不外是矣

募賑族人小引以上先大人貞惠公語

孤兒發科誠足爲幸儻以此自滿重吾憂矣

以上

曾王母董太夫人訓詞

吾不卽殉汝父以汝輩在也汝輩不克負荷吾寧戀戀爲未亡人乎

其廉以居躬嚴以訓士和以處人報國乎報親矣



古稱賀者在閭弔者在室言禍福相倚伏也吾家  
鼎盛若茲汝輩宜惴惴正爾趨保爾躬必無車上  
舞以患苦里子弟也  
以上先慈李太夫人訓詞

安丘劉氏族譜卷十終

安丘劉氏族譜卷十一

家誠

譜成矣是譜也祖宗之所俯而臨孫子之所凝而  
承仁昭義立君子以爲性命之文也子孫而賢合  
敬於斯也同愛於斯也不然者故事奉之孝饗之  
本先薄矣何有於聯同氣長子孫乎約爲誠凡八  
則首在敦睦敦睦在於重譜重譜在於尊祖而惟  
謹行者爲能尊祖著誠者乃克謹行又必務學以



明其理力田以正其業擇術以端其趨無辱吾宗  
無辱吾譜是之謂仁人是之謂孝子矣作家誠第  
十一

敦睦

堯典曰克明峻德以親九族傳曰仁者人也親親  
爲大蓋人道之本在是矣親親之道惟期自盡非  
可以報施計者凡我族屬雖遠近親疏不同情人  
皆吾倫以內之人則事皆吾倫以內之事也不幸

而族屬於我乎寡恩與此其自虧於倫者也吾盡  
吾道以感之則可耳苟曰以是來者以是往則我  
所自有之倫不亦傷乎夫一族之中雖至疏遠遡  
而上之至於一本則皆吾祖之孫子也人而至憾  
其祖之孫子可謂孝與且夫和致祥乖致異家之  
昌未有不起於親睦者自茲以往著爲訓見父老  
則下之遇子弟則愛之疾痛務相關患難必加恤  
勿責過勿畜怒勿惑婦言勿以貴移親勿以利掩



義詩云式相好矣無相猶矣尚其勉之

### 重譜

譜之作也所以合祖宗之德聯族屬之情而教後世子孫以尊尊親親之道也譜之中支派昭矣尊卑定矣貴賤著矣非分之也合之也非疏之也親之也使列是譜者知所自來也知所自來則皆吾同體也故重之也近世來族大齒繁不相往來卒然遇之不知何代之胤甚且名號無聞尊卑逆施

莫之省究乃惑志於攀附滋蔓於私溺與非類雜處重得罪於宗祊者往往而有非不重譜之過與譜成家分一帙奉而識之以無忘祖宗之氣澤焉

### 尊祖

重譜在尊祖者何是記所謂尊祖故敬宗者也反其所始斯樂其所生也不知有祖何知有譜雖然奉先時祀盡物致誠尊止此乎仁孝之旨自幽而明自近而遠其氣類無不孚也故見先祖之子孫



如見先祖焉是之謂尊祖是之謂重譜其悉秉斯  
心以仰對先人也

謹行

詩曰夙興夜寐無忝爾所生又曰戰戰兢兢如臨  
深淵如履薄冰皆言守身也故君子必敬其身敬  
其身乃以紹衣先祖保艾後人無愧彝倫也況乎  
世移俗易人多戾正非無過之人不能持之苟一  
行之失足以墮家聲敗族類可不謹與就善遠罪

可以服物以克吾家各謹其行爲宗族依歸惟悉  
勉之

著誠

著誠去僞所以修身也毋自欺必自慊所以存誠  
也作聖作狂在克念罔念閒耳不衷之言無實之  
行旣與道違必爲物累故省已克私者務嚴戒而  
力持之一涉虛誕痛自罪責人雖未知其獨覺如  
于刑憲焉嗟夫鄉黨自好者誰不願檢身寡過卒



屈於欲理不存矣則不誠之過也惟我宗人其實體力行以永祖德

### 務學

學以窮理也不窮理則無以明倫盡性不可以爲人記曰修禮以耕之陳義以種之講學以耨之詩書之澤其浸潤於人之肌膚腠理者且并其精神色澤而移之故人不可以不學也今人每以聖賢不可及自安於庸衆夫聖賢豈有殊能不過謹修

人道之常耳不學則庸衆且下達而爲禽獸學則爲聖賢循乎實學則聖賢之徒蓋理明則處當於以敦敘乃無憾耳凡我族子弟尚其勗諸

### 力田

雖與務學並列然有重輕焉辨之

農本業也古者士亦寓於農詩云攸介攸止烝我髦士是也故士君子亦不可不明農俊民力學登仕亦將以勸農裕國且正德厚生一致也故古有力田孝弟之文也士學農耕皆人道之正可以治



心可以治身本業之外皆爲末務逐末者理消欲  
長君子戒之其畱心稼穡以無隕高祖以來之業

擇術

余學書至二十不幸遭世亂遂投筆事戎馬驅馳  
南北者且三十年未敢置詩書於度外予豈好武  
哉功隨世就行與心違徒拊膺長歎諉之無可若  
何也檢點生平過多功少無一足法者子弟輩以  
斯途爲捷徑效而尤之大非予心從來國家得勇

將易得仁將難曹彬之下江南千不獲一而長平  
之慘令人悚然泣下一將功成萬骨枯厥後受其  
不祥可不慎哉兵凶戰危猶其末耳吾家以文業  
振興敦詩說禮自有所以長子孫者願後人勤學  
篤行舍彼取此以無貽前人羞則孝子慈孫矣



安丘劉氏族譜卷十一終

族譜後序

譜豈易言哉上世當滄桑草昧之際流離播遷之餘生計尚不暇及又豈其修族譜作文字時邪詩書之後可及此矣而率多因循日復一日終於無徵余小子敢已巳乎乙卯長至日授梓越丙辰三月告竣譜所未詳後人補之志有未竟後人成之願我族人共相勸勉效四時孟月讀譜之法申之以禮義明之以憲章爲酒食以洽其歡胥告誡以



匡其失敦睦愛敬調卹輔植則是譜其庶幾乎是  
舉也徵名則七世孫正位正弼次序則九世孫源  
淶參閱則七世孫正誼正緒書冊則八世孫恣之  
永禎宜竝列名以誌相與有成云正學再識

族譜跋

叔父岱雲公修族譜若干卷竟寄余京邸余受而  
卒業焉乃慨然而歎曰事之興廢豈不以其人哉  
豈不以其時哉吾劉氏占籍渠丘二百餘歲矣前  
乎此者非不甲第蟬聯文章炳煥也而茲事獨闕  
而未舉非忘之也蓋譜之待修者有二而修譜之  
難亦有三何也流離播遷之際方萁路以啟山林  
力田耕鑿之餘亦茹荼而謀家室無事乎譜也子



姓未蕃則屈指而可計源流未遠則比屋而可詳  
無事乎譜也名氏未達于中朝則德功無可紀勲  
猷未登乎國史則文獻無可徵亦無事乎譜也此  
存乎其時者也憚延訪之勤則金石或淪于草莽  
無綜貫之識則支派或擾於蝟毛此考核之難揆  
天乏筆則伏獵貽譏繡虎非長則金根罔辨此潤  
色之難又或慕汾陽之異派而忘其本支溺莒鄆  
之私情而移於他姓則明體達用抑又難也此存

乎其人者也吾伯憲副公常有志而未遑中丞祚  
遠姪亦編摩而未竟此天畱一段公案待叔父以  
有成也尚可謂無其人乎哉尚可謂無其時乎哉  
余小子歷稽厥目有若世系者矣有若世表者矣  
指崑崙以作鎮則南條北條可稽揆星宿以窮源  
則名川支流如睹也有若家傳者矣有若撰述者  
矣修尊祖敬宗之例既無微而不詳發名山石室  
之藏洵有徵而可信也有若內傳外傳者矣彤管



有德則書之所以衍磨趾螽斯之瑞女子之生則  
外之所以謹明嫌別微之端也而且節烈有述矣  
氣千載而如生血三年而化碧也墳墓有紀矣下  
馬之陵可譜京兆之阡可循也家廟有書矣庭堅  
之祀常存若敖之先不餒也而且採諸格言勒爲  
訓誡矣今之視昔旣奉若典謨誓誥之文後之視  
今亦將等諸布帛菽粟之用也嗚呼淵矣備矣蔑  
以加矣余小子又何言哉惟有率諸子孫修明訓  
而又何遏佚之與有

從姪恣之薰沐頓首謹跋



族譜跋

族之有譜所以誌祖先之名諱而知所尊也所以明子孫之世系而知所親也所以序班行表遠近列衆寡而知其枝分派別也故譜有畫畫疏而譜不擾畫有字字貫而畫不斷善觀易者不惟字而惟畫觀譜亦然譜之有畫如木之有本有枝水之有源有流也如木之本一而枝殊水之源一而流殊也故族當有譜譜當有畫畫既明而族因可睹









